

籌辦夷務始末

卷六十九之七十

籌辦夷務始末卷之六十九

道光二十三年癸卯九月壬申軍機大臣穆彰阿等奏本年七月初十日陞任浙江巡撫劉韻珂等奏會籌海疆善後事宜一摺奉

硃批軍機大臣會同該部議奏欽此臣等公同商榷將該撫等原奏二十四條悉心參覈逐條分晰錄呈

御覽恭候

欽定

一原奏稱提標左營兵丁應改為外海水師以重海防等語兵部查浙江提標左營遊擊本屬陸路營分今據奏稱

該營分防之穿山霽靄兩處。咫尺定海。兵數既少。又無大員董率。巡瞭俱不得力。擬將提標左營遊擊移駐穿山。改為外海水師。應如所奏。浙江提標右營遊擊准其移駐穿山。改為外海水師。仍准其將提標右營鎮海營所轄洋汛酌撥數處。歸該營管轄。以專責成。該營原管陸路各汛除穿山霽靄兩處仍隸左營外。其餘各汛准其改派提標中前後三營分隸。應令該撫分別營汛造具圖冊送部辦理。其左營額兵七百三十四名亦應如所請。准其改為外海水師。

一原奏稱鎮海營應改隸提督管轄以期整飭等語。兵部

查鎮海營向歸定海鎮總兵管轄。今據奏稱該營為浙東門戶。最關緊要。相距定海。遠隔重洋。該鎮不能常川內渡。考校兵技。請改歸提督管轄。應如所奏。鎮海營准其改隸提督管轄。

一原奏稱石浦地方。應酌添兵丁。並將昌石營都司移駐其地。以資控制等語。兵部查石浦汛設有守備一員。駐紮甯波府象山縣。茲據奏稱該處逼近大洋。地勢甚為緊要。僅止守備一員。兵亦寥寥。不足以資控制。請將昌石營都司移駐石浦。應如所奏。昌石營都司准其移駐石浦。即名為石浦營。並請於象山左右兩營內撥兵二百名。改為水

師移駐該營之處。亦係因地制宜。應如所奏。准其照數改撥。

一原奏稱乍浦兵數。應酌量加增。並將該營參將陞為副將。以資控制等語。兵部查原奏內稱乍浦地方原設參將一員。該處界居江浙。為江蘇藩籬。杭州保障。與定海亦有犄角之勢。原設兵丁甚少。參將體制不崇。請將該營參將陞為副將。應如所奏。乍浦營參將准其陞為副將。仍作為外海水師題缺。應由閩浙總督另揀合例人員題補。再查乍浦營向止額設外海水師兵四百九十名。茲據奏稱該營兵力較單。自應准其於簡僻營分內撥添兵丁五百一

十名。以資控制。

一原奏稱海鹽縣之澈浦地方。應添設外海水師。以資接應等語。兵部查海鹽縣之澈浦地方。並無設立營汛。茲據奏稱。該處地居海濱。緊接乍浦。勢同唇齒。擬請專設一營。駐札都司一員。千總把總各一員。應如所奏。海鹽縣澈浦地方。准其添設都司千總把總各一員。作為外海水師。駐劄澈浦。即名為澈浦營。仍歸乍浦營統轄。其應設外海水師兵丁三百名。亦准其在於簡僻營分內裁撥。以符定制。一原奏稱海甯州應添設內河水師。以衛根本等語。兵部查該撫等奏稱。海甯州城地段綿長。僅止杭州協派兵分

汛防守。勢殊寡弱。應於海甯州城專立一營。設內河水師都司千總各一員。把總二員。應如所奏。准其於海甯州城添設內河水師都司千總各一員。把總二員。為海甯營。歸杭州協統轄。並准其在於簡僻各營內撥兵四百名。添設該營。作為內河額缺兵丁。所有杭州協原派防兵。自應撤省存營。俾資操習。

一原奏稱現議添設之員升兵丁。應在本省各營裁撥。以節靡費等語。兵部查現在該撫等奏請添設員升兵丁。既經議准。自應於本省事簡營分內酌量裁撥。以示限制。茲據奏稱大荆營都司事務較簡。應移至澈浦。其該營事務



即歸守備辦理。又麗水營都司與處州鎮同城。該營事務可歸該標中營遊擊兼管。應將該營都司移至海甯。再於安吉海防各裁千總一員。嘉興楓嶺太平各裁把總一員。撥赴澈浦海甯分駐。該撫等係為節省經費起見。應如所奏辦理。所有該撫等請裁撤乍浦水手漢兵二百名。衢州鎮標兵一百七十名。處州鎮標兵一百八十名。金華協兵八十名。嚴州協兵八十名。湖州協兵七十名。嘉興協兵九十名。紹興協兵一百二十名。衢州城守營兵三十名。麗水營兵四十名。楓嶺營兵五十名。大荆營五十名。磐石營兵三十名。安吉營兵二十名。共兵一千二百一十名。准其照數



裁撤抵補乍浦澈浦海甯三處新添兵數以節經費。

一原奏稱通省陸路兵丁應選擇十分之三專習火器以備戰守等語。臣等查行軍利用火器為先。應如所議酌選兵丁專習火器。並量予犒賞以資策勵。分別功過以示勸懲。應令該撫等按年造具操練兵技及備弁功過清冊報部查覈。

一原奏稱乍浦駐防旗兵應專習陸戰以備攻守等語。兵部查乍浦駐防額設水手漢兵二百名。前款業已擬裁抵補新添兵數。其額設水手滿兵五十名亦應准其一律裁撤。改為陸路旗兵。俾令專心練習以收實效。所有該營原

設趕繒船十隻。應如所奏。全行裁汰。以節糜費。

一原奏稱水師應令以巡緝為操練。以收實效等語。臣等查覈該撫所議。寓操練於巡緝之中。如此勤加考覈。洋面可就肅清。應如所議辦理。仍由該撫等嚴飭將領。隨時勸懲。實力稽察。不得虛應故事。並造具兵技優劣清冊。報部查覈。

一原奏稱水師各鎮。應照例出洋統巡。並按期會哨。以期整肅等語。臣等查會哨廢弛。洋面匪徒出沒。必至此拏彼竄。該撫請申明定例。責令總兵出洋統巡。按期會哨。庶幾弁兵整肅。水師日有起色。應如所奏辦理。

一原奏稱提督應每年親往沿海各營校閱兵技以資督率等語。兵部查該撫等係為慎重海防。整飭營伍起見。應如所奏。令該提督每年輕騎減從。親往沿海各營認真校閱。如查有各營將弁兵丁技藝生疏。營伍廢弛。即行據實參奏。毋得視為具文。

一原奏稱巡撫每年應親赴乍浦等處校閱兵技。俾有考覈等語。係為慎重校閱起見。應如所議辦理。

一原奏稱水師額設戰船。應俟同安梭船造成試驗後。按營分別安設等語。臣等查水師戰船現存既屬無多。自應俟閩省造船赴浙試驗合用。再按兵丁多寡酌定數目。製

造新船。其改造存留船隻。並分別修葺。及屆期拆造之處。均應照議辦理。

一原奏稱錢塘江內。應添設相宜船隻。以習水戰等語。臣等查同安梭船。既於錢塘江水性不宜。應如該撫等所擬船式。各製一隻。察看何項相宜。再行酌量製造。應令將工料銀數。造具成規細冊。並繪具圖式。送部查覈。

一原奏稱水師應召募善於泅水之人。教習各兵。以廣兵技等語。應如所議。酌募教演。以期得力。不得濫竽充數。有名無實。

一原奏稱招寶金雞兩山。及乍浦等處。原建各礮臺。應照

舊修復。並擇要添築。以衛海口等語。臣等查海疆要隘。全憑大礮守禦。應如所議。各就地勢所宜。分別修復添建。以資捍衛。

一原奏稱鎮海乍浦後路。均應添築礮臺。並將海甯州鳳凰山原建礮臺。移置山下。以昭嚴密等語。臣等查該撫等所議。係為豫籌後路設防起見。應如所議。於各要隘分別建築。移置礮位。以期備豫周密。

一原奏稱海甯海鹽交界之談仙嶺地方。應建築石寨。內修礮臺。以防陸路等語。臣等查該撫等所奏。係為防範省城東路起見。應如所議。建築石寨礮臺。撥兵輪防。以資扼

要。應令該撫等嚴飭各營兵丁。實力輪防。如有玩視偷安。即行重懲。

一原奏稱沿海城寨。應擇要修復。以備藏伏兵船。分艚抄襲等語。應如所奏。由該撫等勘明地址。分別緩急。確實估計。摺節修復。

一原奏稱各兵所需賞項。應酌裁馬兵。節省經費。以資協貼等語。戶部查該撫請裁馬價草乾兵餉。每年節省銀一萬八千一百餘兩。以一萬兩作為操演兵丁賞項。尚餘銀八千一百餘兩。即為加增火藥鉛丸之用。係為整飭營伍。摺節經費起見。應如所奏辦理。仍令將賞給銀兩。年終報

部查覈。至原奏稱裁改之馬兵。仍月給餉銀二兩。俟出缺後。改照戰兵例給餉。查裁改馬兵。其節省銀兩。係馬價草乾與兵餉。共銀一萬八千一百餘兩。現在裁改之馬兵。仍月給餉銀二兩。是兵餉一款。尚未酌減。覈與節省銀數不符。據奏稱。俟出缺後。改照戰兵例給餉。勢必有需時日。現在此項節省銀兩。是否可敷操演賞項。暨加增火藥之用。應令該撫分晰報部。以憑查覈。兵部查該撫等奏稱。該省尚存馬二千四十四匹。請再裁四成馬八百二十匹。俟下屆將各營應行買補馬匹。於裁減數內撥補。毋庸出口購買等語。應如所奏辦理。至前項裁減馬匹。除撥補下屆營



缺外再有多餘。移知江蘇福建等省領買之處。恐多窒礙。仍應令該撫轉飭。即行變價。並令將所裁馬匹毛齒領騎兵丁姓名營分。造入該年朋馬奏銷冊內。送部查覈。其裁馬之兵。八百二十名。亦應如所請。准其出缺後。改為戰兵。俟改補足數。仍令造入彙題冊。以昭查覈。

一原奏稱選練槍礮各兵。所需火藥鉛丸。應分別添製。俾供操用等語。戶部查選練槍礮各兵。應需火藥鉛丸。共需銀二萬六千一百餘兩。除動用裁減馬兵項下存銀八千餘兩外。約不敷銀一萬八千餘兩。據該撫奏稱。體察情形。籌款辦理。應俟籌款造報到日。再行覈覆。兵部查添製藥

鉛。係操演必需之物。應如所奏添辦。其如增價值。並揀回鉛斤章程。應聽工部查覈。工部查此款選練槍礮。需用藥鉛火繩等項。工料銀兩。據該撫等奏稱。體察情形。或飭兩浙商人。按引攤輸。或藩運二庫籌撥。開款另行奏咨辦理等語。應俟該撫等奏咨到日。工部再行覈辦。至所稱年額需用火藥鉛彈。應抵操演大礮之用。儻有不敷。另行籌款製造之處。亦應如該撫等所議辦理。

一原奏稱各處礮臺及戰船內應配礮位。應分別添鑄。各營遺失器械。並飭如數補製。以供操用等語。臣等查礮位軍械。急應添製。以備操防。應如所議。先將省局存鐵添製。